



Sámi Jienat-koara njuolggadusat

Mearriduvvon jahkečoahkkimis 16. beaivvi njukčamánu 2014

§ 1 KOARRA

Koara namma lea Sámi Jienat.

Koara lea prošeaktakoara, mii čoahkkana go stivra dan mearrida. Hárjehallamat ja konsearttat dollojuvvojit iešguđet báikkiin Sámis.

Koara repertoára galgá eanas leat sámegillii. Repertoára galgá leat viiddis ja sisttisdoallat luđiid, lávlagiid, stuorát koarraláidestumiid, sálmmaid ja eará girkomusihka.

Sámi Jienaid váldogiella lea sámegiella ja našunála gielat leat veahkkegielat.

§ 2 ULBMIL

Sámi Jienat galgá ovddidit koaramusihka sámi kulturgaskusteapmin ja obbalaččat bargat sámi koaralávlumiin ja koaragirjjálašvuodain.

§ 3 MIELLAHTTUVUOHTA

Sámi Jienat fátmasta lávluid miehtá Sámi ja lea rabas buohkaide geat hálidit lávlut sámi koaramusihka.

Koara prošeavttaid oasseváldit galget máksán miellahttodivvaga.

Olbmot geat eai doaimma lávlun sáhttet maid leat miellahttun koaras.

§ 4 MIELLAHTTO- JA OASSÁLASTINDIVAT

Miellahttodivada mearrida jahkečoahkkin ja divat galgá speadjalastit Sámi Jienaid doaimma prošeaktakoarran, mii čoahkkinastá stivrra gohččuma vuodul. Miellahttodivada berre máksit ovdal 1. beaivvi miessemánu.

Oassálastindivadiid hárjehallamiin ja/ dahje konsearttain mearrida stivra. Oassálastindivat galget gokčat duohta goluid lávlundoaimmaide vai sáhttá miellahttodivada doalahit oalle vuollin.



§ 5 JAHKEČOAHKKIN

Koara alimus válđi lea jahkečoahkkin.

Dábálaš jáhkečoahkkin dollo juohke jagi ovdal geassemánnu nohká. Jahkečoahkkinbovdehusa galgá sáddet miellahtuide njealji vahku ovdal go jahkečoahkkin dollo.

Jienastanriekti lea dušše sis geat leat máksán miellahttodivada.

Jahkečoahkkimis galgá čállot beavdegirji.

Áššiid jahkečoahkkima gieđahallamii galget bohtán stivrii guokte vahku ovdal go jahkečoahkkin dollo.

Jahkečoahkkimis galget gieđahallamii čuovvovaš áššit:

- Bovdehus ja áššelistu
- Válljet čoahkkinjođiheaddji, čálli ja guokte olbmo beavdegirjevuolláičállimii
- Jahkediđáhus ja rehketoallu
- Ovddasvástáduslucven stivrii
- Doaimaplána ja bušeahtta
- Sisabohtán áššit áššelisttu mielde
- Ekonomianjuolggadusat
- Miellahttodivat
- Válggat

§ 6 VÁLGGAT

Jahkečoahkkin vällje guokte/golbma stivralahtu dan duohken leat go guokte vai golbma stivralahtu válggas áigequovdilis jagi. Stivralahtut välljejuvvojit 2 jahkái.

Jahkečoahkkin vällje stivrajođiheaddji. Stivrajođiheaddji välljejuvvo 1 jahkái.

Jahkečoahkkin vällje 2 várrelahtu. Várrelahtut välljejuvvojit 2 jahkái.

Jahkečoahkkin vällje válgalávdegoddái 2 miellahtu. Válgalávdegoddi välljejuvvo 1 jahkái.

Jahkečoahkkin vällje 2 dárkkisteaddji koara rehketoallui jus koaras ii leat olggobealde dárkkisteaddji. Dárkkisteaddji välljejuvvo 1 jahkái.



§ 7 STIVRA

Koara stivrras leat 5 miellahtu ja 2 várrelahtu. Jahkečoahkkin vállje stivrajođiheaddji. Muđui stivra ieš iežas konstituere.

Stivralahtut válljejuvvojit 2 jahkái. Guokte dahje golbma stivralahtu leat juohke jagi válggas. Stivralahtuid galgá válljet máksi miellahtuid gaskkas.

Stivrras galgá leat 40/60 sohka-bealovddasteapmi.

Stivra doallá čoahkkima čoahkkinplána mielde dahje go jođiheaddji oaidná dárbbu dahje go unnimus golbma stivralahtu dan gáibidit. Stivrras lea mearridanvuoibmi go unnimustá guovttis stivrra miellahtuin ja jođiheaddji dahje nubbinjođiheaddji leat mielde čoahkkimis.

Stivra mearrida goas ja gos jahkečoahkkin dollojuvvo ja ráhkada dasa áššelisttu.

Stivrras lea ovddasvástádus ráhkadit dárbbašlaš šiehtadusaid dirigeanttain ja eará bálkáhuvvon bargiiguin.

Ruhtadoalli galgá diehtit makkár lea ekonomalaš dilli ja ráhkadit rehketoalu. Ruhtadoalli galgá álohii diehtit makkár miellahtut leat máksán miellahttodivada.

Čállit galgá čállit oanehis referáhtaid stivrra čoahkkimiin ja čállit jahkedieđáhusa ovtta stivrrain. Čállit galgá álohii diehtit geat leat koara miellahtut.

Jođiheaddjis ja ruhtadoallis lea goappás ge sierra váldi čállit vuollái dokumeanttaid Sámi Jienaid namas. Stivra sáhtta dárbbu mielde addit vuolláičállinfápmudusa eará stivrralahtuide. Dakkár fápmudus galgá leat čálalaš ja vuolláičállojuvvo jođiheaddjis.

§ 8 EKONOMIA

- Koara ekonomia lea daid doarjagiid duohken maid oažžu iešguđet juolludeddjiin ja miellahttodivada vuodul maid jahkečoahkkin mearrida.
- Stivra galgá jierpmálaččat hálldašit koara opmodaga.
- Koara ekonomiijanjuolggadusat galget mearriduvvot jahkečoahkkimis ja jahkečoahkkin sáhtta daid eanetlogu mielde rievdadit.



- Rehketoallu čuovvu kaleandarjagi.
- Rehketoalu dárkkistit guokte jahkečoahkkimis válljejuvvon olbmo dahje vieris revisora.

§ 9 NJUOLGGADUSRIEVDAMAT

Njuolggadusat galget mearriduvvot ja sáhttet rievdaduvvot jahkečoahkkimis 2/3 oasi eanetloguin.

Evttohusaid njuolggadusrievdamiidda galgá čálalaččat oktan ákkaiguin dieđihit áššin jahkečoahkkimii.

§ 10 HEAITTIHEAPMI

Koara heaittiheami sáhttet mearridit guokte manjalaga dollon dábálaš- ja/ dahje liigejahkečoahkkimat 2/3 oasi jienastusloguin.

Koara opmodaga oamasteami galgá mearridit seamma čoahkkimis eanetlogu jienastemiin.